

Pablo Timoteore ape pūrī ojanemo'que ni'i

A'ti pūrī a'tiro weero ojanopā nise ni'i

Pablo Timoteore Romapɔ bu'iri da'reri wi'ipɔ nígũ, ojacɔ niwĩ. Cũ Timoteore ojamɔ'tãca pūrĩrē a'tiro ojacɔ niwĩ: “Yɔ'ɔ bu'iri da'reri wi'ipɔ nise wapa nipe'tiropɔ Jesucristo ye queti se'saro wee'e”, ni ojacɔ niwĩ. A'ti pūrĩma ti pūrĩ weronojō ojaticɔ niwĩ. Asia di'tacjārã cūrē bu'iri da'reri wi'ipɔ nicã, bopoyasãcārã niwã. Tojo weegɔ nipe'tirã cō'awã'cãno'caro weronojō tɔ'oña'cɔ niwĩ. Luca, tojo nicã Onesíforo ya wi'icjārã dia'cũ cūrē wãcūtutuacã wéerã, bu'iri da'reri wi'ipɔ nigūrē bopoyasãticārã niwã. Pablo “Ni'cũta nisa'a” ni tɔ'oña'gũ, cũ me'rãcjārã waro Timoteore, Marcopɔ cũ tiropɔ pijiocɔ niwĩ. Troapɔ cũ cũu'que paperare, cũ yaro asibusurore miitidutigɔnojōta pijiocɔ niwĩ. Cũ “Maata wērīgũsa'a”, ni wãcũcɔ niwĩ. A'ti pūrĩ cũ ojatɔoca pūrĩ ni'i.

Pablo Timoteore oja'que ni'i

¹ Yɔ'ɔ Pablo Jesucristo besecũú'cɔ ni'i. Cũ yɔ'ɔre Ō'acũ ɔaronojōta cũ ye quetire weredutigɔ o'ówĩ. A'te queti a'tiro ni'i. Ō'acũ “Jesucristore ējōpeorãrē catinu'cũcã weeguti”, nicɔ niwĩ. Cũ ní'caronojōta yɔ'ɔre tere weredutigɔ o'ówĩ.

² Timoteo, mu'urẽ yu'u maigũrẽ oja'a. Mu'u Jesucristo ye quetire yu'u werecã, añurõ ãjõpeowu. Tojo weegu mu'u yu'u macũ weronojõ ni'i. Õ'acũ marĩ pacu, tojo nicã Jesucristo marĩ wiogu mu'urẽ añurõ weeato. Pajaña'to. Mu'urẽ ejerisãjãcã weeato.

“Jesucristore ãjõpeorã ãpẽrãrẽ a'tiro weegua'a” nise ni'i

³ Yu'u Õ'acũrẽ sãrĩsetirinucũ mu'urẽ wãcũ'u. Mu'urẽ wãcũgũ, ñamipũ, umucopũ Õ'acũrẽ e'catise o'o'o. Cũrẽ yu'u ñecũsumua ãjõpeoseti'caronojõta ãjõpeo'o. Yu'u bu'iri moogũ tu'oña'gũ, cũrẽ ãjõpeo'o.

⁴ Timoteo, mu'urẽ pũrõ wãcũ'u. Yu'u mu'u tiropũ ní'cu wijacã, mu'u uti'quere wãcũnu'cũcã'a. Mu'urẽ pũrõ ã'asĩ'rĩsa'a. Mu'urẽ ã'agũ, e'catiguti ní'gũ, tojo wãcũ'u.

⁵ Mu'u Jesucristore queoro ãjõpeosere yu'u wãcũ'u. Mu'u ni'cãrõacã ãjõpeosere mu'u ñecõ Loida, tojo nicã mu'u paco Eunice ãjõpeomu'tãwã. Mu'u quẽ'rã tereta ãjõpeosirutugu wee'e.

⁶ Tojo weegu mu'u a'tiro weecã ua'a. Õ'acũ mu'urẽ weeduti'quere tutuaro me'rã weenu'cũcã'ña. Toduporo yu'u mu'urẽ ñapeocã, Õ'acũ mu'urẽ añuse masĩsere o'owĩ. Tere nemorõ añurõ weenu'cũcã'ña.

⁷ Õ'acũ marĩrẽ Espĩritu Santure o'ówĩ. Cũrẽ o'ógũ, uidutigũ mejẽta o'owĩ. Tojo o'ogũ, tutuase o'ogũre, ma'ise o'ogũre, queoro wãcũse o'ogũre o'owĩ.

8 Tojo weegu marĩ wiogu ye quetire weregu, bopoyaticã'ña. Yu'u quẽ'rãrẽ Jesucristo ye queti bu'ese wapa, bu'iri da'reri wi'ipũ yu'u dujicã, bopoyasãticã'ña. A'tiro pe'e weeya. Jesucristo ye quetire wereya. Tojo werese bu'iri mu'u quẽ'rã ña'arõ yu'rũgusa'a. Tojo wa'acã ï'agũ, "Añurõsa'a", niña. Õ'acũ mu'urẽ tutuaro o'oro põtëorõ tojo weeya.

9 Õ'acũ marĩrẽ pecame'epũ wa'abo'cãrãrẽ yu'rũweticã weewĩ. Cũ añurõ weecã uagu, cũ uaro weedutigũ marĩrẽ besecu niwĩ. Marĩ añuse weesetisere ï'agũ mejëta besecu niwĩ. Cũ pe'e marĩrẽ añurõ weesĩ'rĩgũ besecu niwĩ. A'tiro ni'i. Õ'acũ marĩrẽ ma'ígũ, Jesucristo marĩrẽ yu'rũoatjere wãcũcu niwĩ. Tere a'ti turi weese duporo wãcũtojacu niwĩ.

10 A'tocateroma marĩrẽ yu'rũogũ, Jesucristo a'tise me'rã cũ ma'isere ï'owĩ. Marĩ pecame'epũ wa'abo'cãrãrẽ yu'rũweticã weewĩ. Tojo nicã a'tiro masĩcã weewĩ. Marĩ cũ yu'rũose quetire tu'o ëjõpeorã, catinu'cũrãsa'a nisere masĩcã weewĩ.

11 Õ'acũ te quetire yu'ure weredutiwĩ. Judío masã nitirãrẽ bu'edutigũ yu'ure besecũúwĩ.

12 Te quetire werese bu'iri yu'u pũrõ pi'eti'i. Tojo pi'etimigũ, bopoyawe'e. Yu'u Jesucristore masĩ'i. "Cũ ní'quere queorota weegusami", ni'i. Cũ tutuagu nimi. Yu'ure te queti wereturiase cũu'quere añurõ co'teyapada'reogusami. "Téé apaturi a'tigupũ, co'tenu'cũgũsami", ni'i. Tojo weegu yu'u ne bopoyawe'e.

13 Yu'u mu'urẽ bu'e'quere queoro

bu'ewã'cãña. Añurõ ãjõpeosetiya. A'merĩ ma'iña. Marĩ Jesucristo me'rã nĩrã, tojo weemasĩ'i.

¹⁴ Espĩritu Santu marĩpũre nimi. Cũ weeta-muse me'rã Õ'acũ mu'urẽ weredutigũ cũu'quere añurõ bu'eya.

¹⁵ Mu'ũ masĩtoja'a. Nipe'tirã Jesucristore ãjõpeorã, Asiacjãrã yũ'ure cõ'awijape'tia wa'awã. Na wa'tero nĩ'cãrã quẽ'rã Figelo, tojo nicã Hermógenes mejãrõta weewã.

¹⁶ Onesíforo pũrĩcã tojo weetiwiĩ. Õ'acũ cũrẽ, cũ ya wi'icjãrãrẽ pajaña'gũsami. Pejetiri Onesíforo yũ'ure wãcũtutuacã weewĩ. Apeye quẽ'rãrẽ yũ'ũ bu'iri da'reri wi'ipũ nimicã, yũ'ure bopoyasãtiwiĩ.

¹⁷ A'tiro pe'e weewĩ. Cũ Romapũ ejagũ, yũ'ure upũtu a'macũ niwĩ. Téé bocagupũ, a'madu'uwĩ.

¹⁸ Marĩ wiogũ masãrẽ beseatji nũmũ Onesíforore pajaña'to. Cũ marĩrẽ Éfesopũ weetamu'quere mu'ũ añurõ masĩsa'a.

2

Pablo Timoteore queoro weedutise ni'i

¹ Timoteo, mu'ũ yũ'ũ macũ weronojõ nigũrẽ a'tiro nigũti. Jesucristo mu'urẽ añurõ weemi. Tojo weegũ cũ weetamuse me'rã cũrẽ ãjõpeonu'cũcã'ña.

² Yũ'ũ pãjãrã masã tu'oropũ bu'e'quere wereturiaya. "Á'rãta yũ'ũ bu'esere ãpẽrãrẽ queoro wereturiatu'sama" ni, mu'ũ ĩ'arãnojõrẽ wereya.

³ Mu'ũ Jesucristo ye quetire werese bu'iri mu'urẽ ña'arõ wa'arosa'a. Ësãrẽ wa'a'caro

weronojō wa'arosa'a. Mu'urē tojo wa'acā, wācūtutuaya. Surara weronojō weeya. Cūrē mejēcā wa'acā, wācūtutuasami.

⁴ Surara cū wiogu dutise dia'cūrē weesami. Surara nitigu weronojō weetisami. Tojo weegu m'u cū weronojō weeya. Jesucristo ye dia'cūrē weeya.

⁵ Apī quē'rā omari masū cū wiorā dutisenojōrē queoro weetigu, wapata'atisami. Na cūrē o'obo'quere o'otisama. Tojo weegu añuse bocasī'rīgū, Jesucristo duti'quere queoro weeya.

⁶ Ni'cū wesepu añurō da'ragunojō ti wese cjase ducatisa me'rā dua wapata'amasīsami. Mu' te weronojō Ō'acū ye cjasere añurō bu'égū, te wapa m'u quē'rā wapata'amasī'i.

⁷ Yu'u weresere wācūnrūña. Mu'u tojo weecā, mari wiogu nipe'tisere mu'urē masīcā weegusami.

⁸ Jesucristore wācūña. Cū wērī'cu nimigū, masācu niwī. Cūta dūporocjū wiogu Davi pārāmi nituriagu nimi. Yu'u Jesucristo ye añuse quetire weregū, tereta werewu.

⁹ A'te queti werese bu'iri yu'u pi'etisa'a. Yu'u ña'arō weegú weronojō bu'iri da'leri wi'ipu ni'i. Ō'acū ye queti pūrīcā nipe'tiropu nibi'atoja'a. Yu'ure bu'iri da'leri wi'ipu bi'adūpo'que weronojō niwe'e.

¹⁰ Tojo weegu yu'u pi'etimigū, wācūtutua'a. Ō'acū bese'cārārē añurō wa'ato nīgū tojo wee'e. Na quē'rā mari weronojō Jesucristore ējōpeorā, yu'rūono'rāsama. Añubutiasere bocarāsama. Catinu'cūcā'rāsama. Tojo weegu nipe'tisere

wăcūtutua'a.

¹¹ A'tiro nise diacjŭta ni'i:

Marĩ Jesucristore ějōpeose bu'iri ăpĕră wĕjĕbosama.

Na tojo wĕjĕcă, marĩ Jesucristo me'ră ɯ'mŭsepɯ catinu'cŭrăsa'a.

¹² Marĩ pi'etiră wăcūtutuară, cŭ wiogɯ nirōpɯ cŭ me'ră wioră nirăsa'a.

“Cŭrĕ masītisa'a” nică, cŭ quĕ'ră marĩrĕ “Masīwe'e”, nigŭsami.

¹³ Marĩ cŭrĕ aňurō ějōpeotimică, cŭ pe'e nipe'tise “A'tiro weegɯti” n'iquere queoro weenu'cŭsami.

Ō'acŭ ne ni'căti nisoomasītisami.

Pablo Timoteore queoro bu'edutise ni'i

¹⁴ Mɯ'ɯ bu'erărĕ a'te dɯporo ɯɯ'ɯ oja'quere wăcŭdutiya. ăpĕră ucŭsetirinɯcŭ “Tojo mejĕta ni'i”, nisama. Diacjŭ marĩ wiogɯ tɯ'oropɯ na tojo nisetisere du'udutiya. Te ucŭse wapamarĩi. ăpĕră wăcŭsere dojorĕma.

¹⁵ Mɯ'ɯ pe'e Ō'acŭ yere aňurō bu'eya. Tojo nică cŭ yere queoro weeya. Mɯ'ɯ tojo weecă ĩ'agŭ, mɯ'ɯrĕ “Aňurō weemi”, nigŭsami. Queoro wĕégɯ, mɯ'ɯ da'rasere bopoyasome. Diacjŭ cjasere Jesucristo ye quĕtire queoro wereturiaya.

¹⁶ A'ti turi cjase diacjŭ nitisere na ucŭcă, ucŭtamutică'ňa. A'tiro ni'i. Tere ucŭră, nemorō siape me'ră ňa'ară wa'asama.

¹⁷ Na bu'ese marĩ ɯpɯpɯ cămi boase'saro weronojō ăpĕrărĕ pĕ'rĭpejawă'căsa'a. ă'ră puară Himeneo, Fileto te boase weronojō masărĕ bu'ĕră, dojorĕma.

18 Ñ'rá Ñ'acũ ye quetire queoro bu'etima. A'tiro nima: “Masã wẽrĩ'cãrã masãtojacãrã niwã”, nima. Na tojo nicã tũ'orã, ãpẽrã “¿Ûsã de'ro ãjõpeorãsariba?” ni wãcũma.

19 Ñ'acũ cũ ucũse cũu'que pũrĩcã tutuari wi'i yeenũ'cõ'que weronojõ ni'i. Cũ ye queti ne dũcayuwe'e. A'tiro ni'i. “Marĩ wiogũ Jesucristo cũ yarãrẽ masĩsami.” Tojo nicã “Nipe'tirã 'Jesucristo yarã ni'i', ni wãcũrã ña'arõ weesere du'uato.”

20 A'te queosere wereguti. Ni'cũ peje cõogũ ya wi'ipũre peje bapari nisa'a. Uru me'rã wee'que pari, plata me'rã wee'que pari nisa'a. Tojo nicã apeye yucũ me'rã wee'que pari, di'i me'rã yee'que pari nisa'a. Bosenũmũ nicã añuse parire na ba'awũaropũ peosama. Apeye parire mejõ nirĩ nũmũ peosama.

21 Marĩ a'te weronojõ ña'asere weetirã, bosenũmũ nicã añuse pari peose weronojõ nirãsa'a. Marĩ wiogũ yarã waro nirãsa'a. Cũ nipe'tise añurõ weedutisere queoro weerãsa'a.

22 Tojo weegũ mũ'u ma'mapjia na ãaripejasenojõrẽ weeticã'ña. Queoro weeya. Jesucristore ãjõpeoya. Masã quẽ'rãrẽ ma'ña. Tojo nicã a'mequẽse marĩrõ ñña. Nipe'tirã queoro weerã Ñ'acũrẽ ãjõpeorã me'rã añurõ nicã'ña.

23 Ñpẽrã tojo ucũma'acã, na me'rã ucũtamuticã'ña. Na tũ'omasĩtima. Mũ'u masĩ'i, na tojo ucũrã na ãaro a'metu'tiyapatisama.

24 Mũ'u marĩ wiogũre da'raco'tegũ ni'i. Ne a'metu'titicã'ña. A'tiro pe'e weeya. Nipe'tirã

me'rã añurõ niña. Narẽ añurõ bu'e, na mu'urẽ ña'arõ weesĩ'rĩcã, tojo tu'oña'cã'ña.

²⁵ Mu'u bu'esere tu'osĩ'rĩtirãrẽ añurõ pajaña'se me'rã narẽ "A'tiro pe'e añurõ weeya", niña. Õ'acũ na ña'arõ wee'quere ducayugusami nígu, tojo niña. Na ducayurã, diacjũ cjasere ãjõpeorãsama.

²⁶ Mu'u narẽ tere werecã, tu'omasĩrãsama. Tojo weerã wãtĩ yarã, cã dutiro weemi'cãrã yu'rũwetiwijarãsama.

3

"A'ti turi pe'tise dũporo dicuse ña'ase wã'cãrõsa'a" ní'que ní'i

¹ Mu'u a'tere tu'omasĩña. A'ti turi pe'tise dũporo peje ña'ase wã'cãrõsa'a. A'tiro wa'arosa'a.

² Masã na ye cjase dia'cũrẽ uarãsama. Niyerure uaripejarãsama. "Ãpẽrã yu'rũoro añuyu'rũnu'cã'a", ni wãcũrãsama. Masĩbutiarã weronjõ ucũma'arãsama. Õ'acũrẽ uatirã, ña'arõ cũrẽ ucũrãsama. Na pacũsumuarẽ yu'rũnu'cãrãsama. Ãpẽrã narẽ añurõ weemicã, "Ësãrẽ añurõ weepu", ne nisome. Narẽ e'catise o'osome. Wiopesase me'rã Õ'acũrẽ ãjõpeosome. Marĩ ãjõpeosetisere mejõ nisere weronjõ wãcũrãsama.

³ Ne ãpẽrãrẽ ma'isome. Pajaña'se moorãsama. Ucjasepijarã nirãsama. Na no'o uaro ña'arõ weesĩ'rĩsere weerãsama. Ãpẽrãrẽ ña'arõ pi'eticã weerãsama. Ne cã'rõ añusere uasome.

4 Na me'rãcjãrã nimi'cãrãrẽ ña'arõ weerãsama. No'o uaro weema'acã'rãsama. Na uputu "Ãpẽrã yu'ruoro añuyu'runu'cã'a", ni wãcũrãsama. Õ'acũ pe'ere wãcũrõnojõ o'orã, e'cati nisetisenojõ dia'cũrẽ wãcũrãsama.

5 Õ'acũrẽ ãjõpeorã weronjõ weesoorãsama. Na weesetise me'rã pe'e Õ'acũ tutuasere "Tojo niwe'e", nirãsama.

Nanojõ me'rã ne cã'rõ ba'patima'aticã'ña.

6 Na tojo weerãnojõ a'tiro weesama. Ucũme'rĩse me'rã wi'seripu sãjãasama. Sãjãa, numia tiro toduporo ña'arõ wee'cãrã bu'iritirã, wãcũtutuaturãrẽ niso dojorẽsama. Narẽ mejẽcã ãjõpeocã weesama. Na numia nipe'tise ña'arõ weesere uaripejasama.

7 Nipe'tise bu'esere masĩsĩ'rĩmirã, ne diacjũ cjasere masĩtu'ajatisama.

8 Numiarẽ nisoori masã puarã Janes, Jambres weronjõ nima. Na duporopu Moisé nícateropure na Egiptocjãrã tu'oña'rĩ masã nicãrã niwã. Na Moisére ĩ'atu'ticãrã niwã. Diacjũ cjasere ne uaticãrã niwã. Na weronjõ ã'rã quẽ'rã diacjũ cjasere uatima. Ña'arõ wãcũpo'cãrã ne queoro ãjõpeomasĩtima.

9 Na ucũma'ase maata pe'tirosa'a. Nipe'tirã na ucũcã tu'orã, "Tojo nima'arã weema", nirãsama. Moisére uati'cãrã Janes, Jambres weronjõ wa'arosa'a. Titapure na nima'asere masã masĩcãrã niwã. Mejãrõta tja ã'rã quẽ'rãrẽ na nima'asere masĩrãsama.

Pablo Timoteore "A'tiro weeya" cã nituo'que ni'i

10 Mũ'u pũrĩcã yũ'u bu'ese nipe'tisere añurõ masĩ'i. Yũ'u weesetisere, yũ'u weesĩ'rĩsere masĩ'i. Tojo nicã yũ'u Õ'acũrẽ ãjõpeosere masĩ'i. Æpẽrã queoro weeticã, yũ'u tojo tũ'oña'sere mũ'u masĩ'i. Yũ'u ma'isetisere, mejẽcã wa'acã wãcũtutuasere mũ'u masĩ'i.

11 Masã yũ'ure ña'arõ weecã, pi'etiwũ. Nipe'tise a'te macãrĩpũ wa'a'quere mũ'u masĩ'i. Antioquíapũ, Iconiopũ, Listrapũ yũ'u pi'eti'quere mũ'u masĩ'i. Pi'etisetirinucũ marĩ wiogũ yũ'ure yũ'rũweticã weewĩ.

12 Diacjũta ni'i. Jesucristore ãjõpeorã nipe'tirãrẽ Õ'acũ ãaronojõ añurõ weesĩ'rĩrãrẽ ãpẽrã ña'arõ weerãsama.

13 Ña'arĩ masã, tojo nicã nisoori masã nemorõ ña'arõ weenemopeorãsama. Nisoonemowã'cãrãsama. Nisoorã nimirã, na quẽ'rã nisoono'o, ãjõpeorãsama.

14 Mũ'u pũrĩcã mũ'urẽ bu'e'quere queoro ãjõpeonu'cũcã'ña. Queoro weeya. Mũ'u tere "Diacjũta ni'i", nisa'a. Mũ'u mũ'urẽ bu'e'cãrãrẽ masĩ'i.

15 Mũ'u wĩ'magũputa Õ'acũ ye queti ojãca pũrĩ cjasere masĩnu'cãwũ. Tere bu'égũ, mũ'u Õ'acũ yere masĩwũ. Masĩ, Jesucristore ãjõpeose me'rã yũ'rũono'wũ.

16 Õ'acũ ye queti ojãca pũrĩ cjasere ojadutigũ, cã masĩse o'ose me'rã ojaduticũ niwĩ. Te oja'quere bu'érã, diacjũ nisere masĩno'o. Marĩ ña'arõ wee'que quẽ'rãrẽ "Ña'a ni'i", nino'o. Marĩ ña'arõ wee'quere dũcayumasĩcã wee'e. Tere bu'érã, queoro weenu'cũmasĩ'i.

17 Õ'acũ cũ yarãrẽ nipe'tise añurõ weesere weemasĩato níguũ cũ ye cjasere ojaduticũ niwĩ.

4

1 Jesucristo nipe'tirã wiogu tutuaro me'rã a'tigusami. A'tigu, masã catirãrẽ, wẽrĩ'cãrãrẽ be-segusami. Õ'acũ, tojo nicã Jesucristo tũ'oropure mu'urẽ a'tiro weeduti'i.

2 Masãrẽ Õ'acũ ye quetire wereya. Nipe'tisetiri masã tũ'osĩ'rĩcã, wereya. Na tũ'osĩ'rĩticã quẽ'rãrẽ, werenu'cũcã'ña. Mu'ũ weresere tũ'orã, ãjõpeorãsama. Na queoro weeticã, tu'tiya. "A'tiro weerua'a", niña. Narẽ bu'égũ, queoro pajaña'se me'rã wereme'rĩcã'ña.

3 Be'ropure masã añuse bu'esere uatirãsama. Tojo weegu a'tiro nicãrẽ queoro bu'ewe'oya. Be'ropure a'tiro wa'arosa'a. Na, na uaro weerãsama. Na tũ'otu'sase dia'cũrẽ tũ'osĩ'rĩrãsama. Tojo weerã tere bu'eajã pãjãrãrẽ a'marãsama.

4 Na diacjã cjasere tũ'osome. Nipe'tise no'o werema'ase pe'ere tũ'orãsama.

5 Timoteo, mu'ũ pũrĩcã queoro wãcũña. Mu'ũ Jesucristo ye quetire werecã, masã mu'urẽ ña'arõ weerãsama. Na tojo weecã, wãcũtutuaya. Jesucristo masãrẽ yũ'rũomi nise quetire du'ucũurõ marĩrõ werenu'cũcã'ña. Mu'urẽ weeduti'quere weetu'ajanũ'cõña.

6 Yũ'ũ wẽriãtjo cã'rõ du'sa'a. Yũ'ure masã Õ'acũrẽ wa'icũrãrẽ ãjũamorõpeo'caro weronojõ wa'arotiro wee'e. Tojo weegu mu'urẽ tojo duti'i.

7 Yũ'ũ Jesucristo ye quetire weregu, nipe'tise yũ'ũ tutuaro põtẽorõ weewũ. Nipe'tise

Õ'acũ yu'ure duti'quere tu'ajatoja'a. Ne cãrẽ ãjõpeodu'uwe'e.

⁸ Ni'cãrõacãrẽ majã Õ'acũ yu'ure añurõ wee'que wapa o'oatje du'sa'a. Marĩ wiogu Õ'acũ masãrẽ beseatji nũmũ nicã, yu'ure o'ogusami. Cũ masãrẽ queoro besemi. Yu'u dia'cũrẽ o'osome. Nipe'tirã cãrẽ ãjõpeorã cã a'tiatjere uarãrẽ o'ogusami.

Pablo cã ye cjasere were'que ni'i

⁹ Mu'u põtõorõ a'tita basioro yu'u tiropu maat-
acure i'agũ a'tia.

¹⁰ A'tiro ni'i. Crescente wãmetigu Galacia wãmetiropu wa'awĩ. Tojo nicã Tito Dalmaciapu wa'awĩ. Demas pũrĩcã a'ti turi cjasere nemorõ ma'iyu'rũnu'cãgũ, yu'ure cõ'awã'cã wa'awĩ. Cũ Tesalónicapu wa'awĩ.

¹¹ Luca dia'cũ yu'u me'rã nimi. Marcure a'maña. Mu'u me'rã a'tiato. Cũ yu'ure weeta-
musere u'a'a.

¹² Yu'u Tiquicore Éfesopu o'ówu.

¹³ Mu'u a'tigu, yaro su'tiro asibusuro bu'icjãrõrẽ miitia. To Troa wãmetiri macã Carpo ya wi'ipu nisa'a. Yé papera tũrũrĩrẽ miitia. Wa'icũrã caseri me'rã oja'que yé caserire acobojotibutiãcã ña.

¹⁴ Alejandro cõme me'rã da'rari masũ yu'ure ña'abutiario weewĩ. Õ'acũ marĩ wiogu cũ wee'caro ejatuario cãrẽ bu'iri da'regusami.

¹⁵ Mu'u pũrĩcã cãrẽ tu'omasña. Cũ marĩ bu'esere ne uatiyu'rũami.

16 Ne waro wiorã yu'ure sērĩtiña'cã, ne ni'cũ yu'ure weetamutiwĩ. Nipe'tirã yu'ure cõ'awã'cã wa'awã. Õ'acũ na tojo wee'quere acobojocã ɯ'a'a.

17 Õ'acũ pũrĩcã yu'ure weetamuwĩ. Yu'ure tutuase o'owĩ. Tojo weegɯ wiorãrẽ yu'u a'tiro werewɯ. Jesucristo masã ña'arõ niseti'quere yu'rɯomi nise quetire narẽ werepe'ocã'wũ. Nipe'tirã a'ti ɯmɯcocjãrã judío masã nitirã te quetire tu'oato nígũ tojo werewɯ. Apeye quẽ'rãrẽ Õ'acũ yu'ure a'tiro weewĩ. Yaiwa ba'ano'bo'cure weronojõ wiose wa'teropɯ nigũrẽ yu'rɯweticã weewĩ.

18 Tojo nicã nipe'tise yu'ure be'ropɯ ña'arõ weeatjere yu'rɯweticã weegɯsami. Ɔ'mɯsepɯ cũ wiogɯ nirõpɯ yu'ure miagũsami. Masã Õ'acũrẽ añurõ ucũnu'cũato. Tojota wa'ato.

Pablo añudutitɯo'que ni'i

19 Prisca, Aquila añuato. Tojo nicã Onesíforo ya wi'icjãrã quẽ'rã añuato.

20 Erasto Corintopɯ tojaque'awĩ. Trófimoma dutitigure Miletopɯ cõ'awã'cãtiwɯ.

21 Mɯ'u põtëorõ a'tita basioro pu'ecu dɯporo a'tia. Eubulo, Pudente, Lino, Claudia, nipe'tirã marĩ acawererã mɯ'urẽ añudutima.

22 Jesucristo marĩ wiogɯ mɯ'u me'rã niato. Õ'acũ mɯsã nipe'tirãrẽ añurõ weeato.

Tocã'rõta oja'a.

Pablo

Õ'âkã hi yeere uúkũri turi Tukano New Testament in Tucano (BR:tuo:Tucano)

copyright © 2009 Wycliffe Bible Translators, Inc.

Language: Tucano

Translation by: Wycliffe Bible Translators, Inc.

Tucano [tuo], Brazil

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tucano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-12-01

PDF generated using Haiola and XeLaTeX on 18 Apr 2025 from source
files dated 31 Aug 2023

00ebd04f-7b0d-5a72-9407-eb53ae2bd086